



Gerioù ar vuhez

ARMAND ROBIN

Armand Robin

Ganet e oa bet Armand Robin d'an **19 a viz Genver 1912**, e Kêrfloc'h, Plougernevel.

Peizanted e oa e dud ha brezhonegerien anezhe. Hini diwezhañ un tiegezh eizh bugel e oa Armand.

Da Skol Publik Rostrenn e oa bet kaset pa oa c'hwec'h vloaz. Eno en doa desket galleg.

Dalc'het en doa gant e studioù e Skolaj Kompostal. Ennañ en doa tapet e vachelouriezh da 16 vloaz.

Ur bugel **speredek-tre** e oa Armand. Graet e veze « Voltaire » deusañ gant e gamaradoù. Plijout a rae dezhañ farsal ha tammoù kudennoù en doa bet e Kompostal abalamour ec'h ae er maez al lezenn alies a-walc'h. Dalc'het en doa gant studioù uheloc'h e Sant-Brieg, Pariz ha Lyon.

Dedennet-mik gant ar **yezhoù** e oa. Dre holl en doa studiet war-dro **tregont yezh**, rusianeg, poloneg, arabeg ha kembraeg en o mesk.

Troer ha kazetenner war e gont e oa deuet da vezañ. Da noz e veze o selaou radioioù estren. Kas a rae d'ar c'hazetennoù pennadoù graet gantañ diwar ar pezh e veze klevet gantañ.

Kalz **barzhonegoù** en doa skrivet Armand Robin. Brezhoneger e oa met skrivañ a rae e **galleg** dreistholl. Troet e oa bet e galleg gantañ ur varzhoneg gant **Maodez Glanndour** : **Milc'hwid ar serr-noz** (Le Mauvis de proche nuit).

D'ar **27 a viz Meurzh 1961** e oa bet **serret gant an archerien** goude un tamm reuz etre Armand ha boulisted deuet da c'hoari en un davarn nebell deus e di. Stenn e veze an traoù gant **brezel Aljeri** d'ar c'houlz-se ha kudennoù en doa bet dija gant an archerien abalamour d'e vennozhioù politikel. Enep ar brezel e oa Armand Robin ha brudet-mat e oa evit se.

E **1933** e oa bet e **Pologn** hag e **Rusi**. Dipitet-bras e oa bet p'en doa gwelet peseurt mod e troe an traoù evit gwir du-hont. Ne oa ket eno ar « baradoz ruz » en doa ijinet.

Diwar neuze en doa maget kaz ouzh tout an diktatouriezhoù ha **stourmet** en doa e vuhez-pad evit ar **justis hag ar frankiz**. Un den frank e spered e oa ha ne faote ket dezhañ en em lakaat a-dreñv strollad politikel ebet.

Warlerc'h ar brezel en doa skrivet e-barzh **kazetennoù** savet gant ar rezistanted evel **Combat** peotramant **Libération**. Treut e veze ar peuriñ gantañ peogwir ne c'houneze ket mat e vuhez tamm ebet.

D'an **29 a viz Meurzh** e oa marvet e ti an archerien d'an oad a 49 bloaz.

Betek bremañ e chom kevrinus an afer ha n'eus bet roet titour resis ebet gant an archerien da ziluziañ plegennoù e varv...

COPFINANÇÉ PAR
UNION EUROPÉENNE
UNANIEZH EUROPA



L'Europe s'engage
en Bretagne



Avec le Fonds européens
de développement régional